



04 APR, 2026

Perak perkukuh agenda tenaga hijau

Utusan Malaysia, Malaysia



Perak perkukuh agenda tenaga hijau

PETALING JAYA: Negeri Perak terus memperkukuh kedudukannya sebagai pemacu utama ekonomi hijau negara menerusi pelaksanaan Projek Program Pelanjutan Hayat Hidro (HLEP) yang melibatkan pelaburan bernilai RM5.8 bilion oleh Tenaga Nasional Berhad (TNB).

Menteri Besar Perak, Datuk Seri Saarani Mohamad berkata, projek strategik di koridor hidroelektrik Sungai Perak itu bukan sahaja meningkatkan kecekapan operasi stesen janakuasa, malah bakal menjadikan Perak sebagai Pusat Strategik Tenaga Bersih yang mampu menarik pelaburan bernilai tinggi.

Menurut beliau, dengan kapasiti penjanaan mencecah 650.75 megawatt (MW), projek ini akan menjadi pemangkin pertumbuhan ekonomi di Hulu Perak, sekaligus mengangkat kawasan seperti Gerik sebagai pusat sokongan ekonomi baharu yang dinamik.

“Perak bukan sekadar menyumbang kepada sektor tenaga negara, tetapi sedang membina kedudukan sebagai pemacu masa depan ekonomi hijau. Ini adalah langkah strategik jangka panjang yang akan menentukan daya tahan ekonomi negeri dalam dekad akan datang,” katanya.

Teks ucapan beliau disampaikan oleh Pengerusi Jawatankuasa Infrastruktur, Tenaga, Air dan Pengangkutan Awam Perak, Da-



MOHAMMAD Nizar Jamaluddin (kiri) hadir ke Majlis Pecah Tanah Fasiliti Penempatan Berpusat Bagi Projek Program Pelanjutan Hayat Hidro (HLEP).

tuk Seri Ir. Haji Mohammad Nizar Jamaluddin pada majlis pecah tanah Fasiliti Penempatan Berpusat, baru-baru ini.

Projek HLEP yang dilaksanakan TNB dengan kerjasama Konsortium Voith-HeiTech itu turut disokong oleh pembangunan Fasiliti Penempatan Berpusat yang mampu menampung kira-kira 200 tenaga kerja.

Sementara itu, Ketua Eksekutif

Perbadanan Kemajuan Negeri Perak (PKNPk), Datuk Redza Rafiq menjelaskan, fasiliti penempatan tersebut merupakan komponen kritikal bagi memastikan kecekapan operasi projek berskala besar di samping menjamin kebajikan pekerja.

“PKNPk bertindak sebagai pemudah cara dalam penyelarasan teknikal dan kelulusan dengan pihak berkuasa bagi memastikan

projek berjalan lancar. Fasiliti ini menyediakan persekitaran kondusif dan selamat agar tenaga kerja dapat beroperasi pada tahap optimum,” katanya.

Katanya, pengukuhan koridor hidroelektrik Temengor-Bersia-Kenering akan terus meningkatkan keyakinan pelabur terhadap keupayaan tenaga negeri, terutamanya dalam menyokong sektor teknologi tinggi dan pusat data.